



SIARAN MEDIA

PROGRAM SKILLBOX PERKUKUH JATI DIRI DAN KEPIMPINAN GENERASI MUDA

ALOR GAJAH, 10 Mei 2026 – Ketua Pengarah Jabatan Penerangan Malaysia (JAPEN), Julina Johan hari ini menyantuni para pelajar ahli Kelab Malaysiaku sempena Majlis Perasmian Penutupan Program SKILLBOX@Kelab Malaysiaku Zon Semenanjung Tahun 2026 bertempat di Kem Permata Resort, Alor Gajah, Melaka.

Program SKILLBOX merupakan inisiatif JAPEN untuk melatih ahli Kelab Malaysiaku dalam aspek komunikasi, kepimpinan dan jati diri. Bertemakan Aspirasi Diri Anak Bangsa (ADAB) ini bertujuan melahirkan generasi pelajar yang berani dan bijak dalam mendepani cabaran masa kini menerusi pendedahan kemahiran insaniah secara praktikal.

Program yang berlangsung selama tiga hari dua malam bermula 8 hingga 10 Mei ini telah menarik penyertaan seramai 500 orang ahli Kelab Malaysiaku. Pengisian program merangkumi slot Bicara Dari Hati bersama Yayasan Nur Inspirasi, segmen Kenegaraan dan Patriotisme bersama artis budaya PENTARAMA JAPEN serta slot Road to Varsity oleh MC+ yang menampilkan pempengaruh pendidikan, Sir Badang dan Sir Fathi.

Selain itu, para peserta turut didedahkan kepada elemen inovasi DIY menerusi segmen Interaktif@Influencer bersama pempengaruh muda, Amin dan Abid dengan sokongan tajaan STEM kit oleh Yayasan MR. D.I.Y. Sebagai nilai tambah, majlis perasmian penutupan hari ini dikendalikan sepenuhnya oleh para pelajar sebagai latihan praktikal dalam pengurusan majlis dan kepimpinan berdasarkan modul yang telah dipelajari.

Turut hadir, Ketua Penolong Pengarah Jabatan Pendidikan Negeri Melaka, Hasiran Lemat dan Pengarah JAPEN Negeri Melaka, Mazli bin Hamdan.

**Dikeluarkan oleh:
Jabatan Penerangan Malaysia**